

四庫全書

史部

欽定四庫全書

欽定續通志卷七十八

后妃傳八

遼

太祖淳欽皇后舒嚕氏 太宗靖安皇后蕭氏

世宗懷節皇后蕭氏 甄妃

穆宗皇后蕭氏 景宗睿知皇后蕭氏

聖宗仁德皇后蕭氏 欽哀皇后蕭氏

興宗仁懿皇后蕭氏

蕭貴妃

道宗宣懿皇后蕭氏

蕭惠妃

天祚皇后蕭氏

蕭德妃

蕭文妃

蕭元妃

太祖淳欽皇后舒魯氏諱平小字鄂爾多其先回鶻人父巴噶穆爾名淵仕約尼氏為額珍尼果齊喀后簡重果斷有雄畧太祖即位羣臣上尊號曰地皇后神冊元年大冊加號應天大明地皇后行兵御衆后嘗與謀太

祖嘗渡磧擊党項黃頭錫伯二室韋乘虛襲之后勒兵以待奮擊大破之名震諸夷時晉王李存勗欲結援以叔母事后幽州劉守光遣韓延徽求援后請用之太祖召與語大悅以為謀主吳主李昇獻猛火油以水沃之愈熾太祖選三萬騎攻幽州后曰豈有試油而攻人國者指帳前樹曰無皮可以生乎太祖曰不可后曰幽州之有土有民亦猶是耳吾以三千騎掠其四野不過數年困而歸我矣何必為此萬一不勝為中國笑吾部落

不亦解體乎東平渤海后與有謀太祖崩后稱制攝軍
國事及葬欲以身殉親戚百官力諫因斷右腕納于柩

按五代史契丹紀載遼太祖崩后殺從行大將百餘人
左右有過者多送之墓所殺之大將趙思溫當往不肯
行后曰爾先帝親信安得不往見之對曰親莫如后后
何不行后曰可斷吾臂以送之乃斷其一腕而釋思溫
與本傳所云
抑揚互異 太宗即位尊為皇太后会同初上尊號曰

廣德至仁昭烈崇簡應天太后太后嘗屬意於少子魯
呼太宗崩世宗即位于鎮陽太后怒遣魯呼以兵逆擊
魯呼敗太后親率師過于潢河之橫渡賴耶律烏哲諫

罷兵遷太后于祖州應歷三年崩年七十五祔祖陵諡

曰貞烈重熙二十一年更今諡

按遼史太祖后傳前載
肅祖懿祖玄祖德祖四

后今依鄭
例從剛

太宗靖安皇后蕭氏小字溫淳欽皇后弟實魯之女帝
為大元帥納為妃生穆宗及即位立為皇后性聰慧潔
素尤被寵顧雖軍旅田獵必與天顯十年崩諡彰德葬
奉陵重熙二十一年更今諡

世宗懷節皇后蕭氏小字薩哈勒齊淳欽皇后弟阿固

齊之女帝為永康王納之生景宗天祿未立為皇后明年秋生萌古公主在蓐寮克作亂弑太后及帝后乘步輦直詣寮克請畢收殮明日遇害諡曰孝烈皇后重熙二十一年更今諡

妃甄氏後唐宮人有姿色帝從太宗南征得之寵遇甚厚生寧王札穆及即位立為皇后

按世宗紀天祿四年冊皇后蕭氏皇子表

但稱妃甄氏而不言后此云立為皇后紀載互異

嚴明端重風神閑雅內治有

法莫干以私世宗承強盛之資奄奄歲時后與叅帷幄

密贊大謀不果用察克亂遇害景宗立葬二后於醫巫閭山建廟陵寢側

穆宗皇后蕭氏父知璠內供奉翰林承旨后幼有儀則帝居藩納為妃及正位中宮性柔婉不能規正無子

景宗睿知皇后蕭氏諱綽小字燕燕北府宰相思溫女帝即位選為貴妃尋冊為皇后生聖宗景宗崩尊為皇太后攝國政以耶律色珍韓德讓叅決大政委裕悅休格以南邊事統和元年上尊號曰承天皇后二十四

年加上尊號曰睿德神畧應運啓化承天皇后二十七年崩諡曰聖神宣獻皇后重熙二十一年更令諡后明達治道聞善必從故羣臣咸竭其忠習知軍政澶淵之役親御戎車指麾三軍賞罰信明將士用命聖宗稱遼盛主后教訓為多

聖宗仁德皇后蕭氏小字菩薩格睿智皇后弟烏延之

女

東都事略作平州節度使蕭猥思之女

年十二美而才選入掖庭統和

十九年冊為齊天皇后嘗以草筵為殿式密付有司令

造清風天祥八方三殿既成益寵異所乘車置龍首鵠
尾飾以黃金又造九龍輅諸子車以白金為浮圖各有
巧思生皇子二皆早卒開泰五年宮人訥木錦生興宗
后養為子帝大漸訥木錦嘗后曰老物寵亦有既耶左
右扶后出帝崩訥木錦自立為皇太后是為欽哀皇后
護衛馮嘉努吉遜等希旨誣告北府宰相蕭珠卜國舅
蕭必塔謀逆詔令鞠治連及后興宗聞之曰皇后侍先
帝四十年撫育眇躬當為太后今不果反罪之可乎欽

哀曰此人若在恐為後患帝曰皇后無子而老雖在無能為也欽哀不從遷后于上京車駕春蒐欽哀慮帝懷鞠育恩馳遣人加害使至后曰我實無辜天下共知卿待我浴而後就死可乎使者退后崩重熙二十一年

據
典

宗紀
增輯

追尊仁德皇后與欽哀並祔慶陵

欽哀皇后蕭氏小字訥木錦淳欽皇后弟阿固齊五世孫黜面狠視入宮生興宗仁德皇后無子取而養之如已出后以興宗侍仁德皇后謹不悅聖宗崩遷仁德皇

后於上京害之自立為皇太后攝政以生辰為應聖節

重熙元年尊為法天應運仁德章聖皇太后

按重熙元年二十三年

年兩加尊號傳誤合為一謹據興宗紀增輯

二十三年加上尊號曰仁慈聖

善欽孝廣德安靜貞純懿和寬厚崇覺儀天皇太后興

宗初年后陰召諸弟議欲立少子重元重元以所謀白

帝帝收太后符璽遷于慶州七括宮八年

傳誤六年秋據本紀改

帝悔之親馭奉迎侍養益孝謹后常不懌帝崩殊無戚

容清寧初尊為太皇太后崩諡曰欽哀皇后葬慶陵

據道

宗紀
增輯

興宗仁懿皇后蕭氏小字塔喇欽哀皇后弟孝穆之長
女性寬容姿貌端麗帝即位入宮生道宗重熙四年立
為皇后二十三年號貞懿慈和文惠孝敬廣愛崇聖皇
后道宗即位尊為皇太后清寧二年上尊號曰慈懿仁
和文惠孝敬廣愛宗天皇太后九年秋敦睦宮使耶律
良以重元與其子尼嚕古反狀密告太后乃言于帝帝
疑之太后曰此社稷大事宜早為計帝始戒嚴及戰太

后親督衛士破逆黨太康二年崩諡仁懿皇后仁慈淑謹中外感德凡正旦生辰諸國貢幣悉賜貧瘠

興宗貴妃蕭氏小字織察駙馬都尉必魯之女選入東宮帝即位立為皇后重熙初以罪降貴妃

道宗宣懿皇后蕭氏小字觀音欽哀皇后弟樞密使惠之女姿容冠絕工詩善談論自制歌詞尤善琵琶重熙中帝王燕趙納為妃清寧初立為皇后二年群臣上尊

號曰懿德

按王鼎焚椒錄云清寧元年冊為皇后二年群臣上帝尊號曰天祐皇帝后曰懿德皇后

原傳云立為懿德皇后蓋併兩事為一事也今改正

皇太叔重元妻以艷冶自矜

后見之戒曰為貴家婦何必如此后生太子濬有專房寵好音樂伶官趙惟一得侍左右太康初宮婢單登教坊朱頂鶴誣后與惟一私樞密使耶律伊蘇以聞詔伊蘇與張孝傑劾狀因而實之族誅惟一賜后自盡歸其屍於家乾統初追諡宣懿皇后合葬慶陵

道宗惠妃蕭氏小字塔斯駙馬都尉錫默之妹太康二年伊蘇譽之選入掖庭立為皇后居數歲未見皇嗣后

妹額特埒先嫁伊蘇子蘇雅后以宜子言于帝離婚納
宮中八年皇孫延禧封梁王降為惠妃徙乾陵額特埒
還其家頃之其母燕國夫人厭魅梁王伏誅貶妃為庶
人幽于宜州諸弟沒入興聖宮天慶六年召還封太皇
太妃後二年奔黑頂山卒葬太子山

天祚皇后蕭氏小字多囉倫宰相繼先五世孫大安三
年入宮明年封燕國王妃乾統初冊為皇后性閑淑有
儀則兄弟奉先保先等緣后寵柄任金兵至從天祚西

狩以疾崩

蕭德妃小字實古北府宰相常格之女壽隆二年入宮封燕國妃生子塔魯乾統三年改德妃以柴冊禮封塔魯為燕國王加妃號贊翼王薨以哀戚卒

蕭文妃小字色哩國舅大父房之女乾統初帝幸耶律特爾格第見而悅之匿宮中數月皇太叔和囉噶勸帝以禮選納三年冬立為文妃生蜀國公主晉王額魯溫尤被寵幸以柴冊加號承翼善歌詩金兵日見侵迫帝

政遊不恤忠臣多被踈斥妃作歌諷諫天祚銜之元后
兄蕭奉先誣南軍都統伊都謀立晉王以妃與聞賜死
蕭元妃小字貴格燕國妃之妹年十七冊為元妃性沉
靜嘗晝寢近侍盜貂裯妃覺而不言宮掖稱其寬厚生

梁王雅爾

據皇子表增輯

從天祚西狩以疾薨

按大金國志云兀室誅伊都并

及宗翰次室蕭氏因請罪于宗翰曰蕭氏本契丹天祚元妃也張滙金節要亦云宗翰之妻乃天祚元妃而契丹國志并以宗翰次室為天祚皇后遼史則並云以疾亡未詳孰是

公主附

按遼史無公主傳今據公主表增輯

太祖一女

質古幼為與姑契丹故俗凡婚燕之禮推女子之可尊敬者坐于與謂之與姑下嫁淳欽皇后弟蕭寶嚕未封而卒

太宗二女

燕國公主魯爾古下嫁北府宰相蕭寶衮應歷間封汧國長公主保寧中進封燕國大長公主
北威下嫁北府宰相蕭哈里未封而卒

世宗三女

秦國公主和克坦下嫁侍中蕭都哩保寧間封秦國長公主

晉國公主觀音下嫁蕭實喇保寧間封晉國長公主
薩喇下嫁蕭幹里未封而卒

景宗四女

魏國公主觀音女下嫁北府宰相蕭繼先進封齊國景
福中封燕國大長公主重熙初薨

吳國公主長壽女下嫁宰相蕭巴雅爾統和初進封衛國改封魏國長公主開泰六年薨

越國公主延壽女下嫁蕭恒德性沉厚睿智皇后尤愛之蚤薨追封趙國

碩格渤海妃所生下嫁盧俊改適蕭神努無封號

聖宗十四女

隨國公主燕格下嫁蕭丕拉進封秦國興宗時封宋國長公主

魏國公主伊木沁開泰七年封下嫁蕭多卜改適蕭哈
里又適蕭呼圖克又適韓國王蕭惠進封秦國長公主
改封秦晉國清寧初加大長公主

越國公主舒古進封晉國姿質秀麗禮法自將下嫁蕭
孝忠景福初封晉蜀國長公主清寧初加大長公主

南陽公主楚巴下嫁蕭孝先初封郡主太平末東京大
延琳反遇害

長寧公主陶格初封郡主下嫁蕭揚祿

荆國公主達年初封平原郡主下嫁蕭雙古

潯陽公主玖格初封郡主下嫁蕭璉

臨海公主長壽初封郡主下嫁達喇齊達喇齊坐大延
琳事伏誅改適蕭繅古

同昌公主巴格初封縣主下嫁劉三蝦

三河公主實格初封郡主下嫁奚王蕭果濟

仁壽公主必實初封縣主下嫁劉四端

泰格下嫁蕭呼哩

金鄉公主賽格初封郡主統和中下嫁蕭托雲以殺奴婢得罪薨於貶所

興格下嫁蕭旺祿

興宗二女

魏國公主巴沁下嫁蕭薩巴重熙末徙封晉國清寧初加長公主改適蕭呼蘇以婦道不修徙中京又嫁蕭沃

聶

鄭國公主幹爾達下嫁蕭額哩頁清寧間加長公主壽

隆末加大長公主

道宗三女

鄭國公主索克濟端麗有智下嫁蕭默咸雍中徙封魏國國太康初薨

齊國公主吉里下嫁蕭托卜嘉進封趙國托卜嘉坐昭懷太子事被害其弟額圖渾欲逼尚公主公主以其黨伊遜也惡之未幾額圖渾以事伏誅時天祚尚幼伊遜用事公主每以匡救為心竟誅伊遜大安五年薨

越國公主特哩下嫁蕭綽鄂太康八年綽鄂得罪離之
太安初改適蕭特默乾統初進封秦晉國大長公徙封
梁宋國特默與金人戰敗於石輦鐸被擒公主從天祚
出奔後攻應州留公主守輜重金人圍之公主奔行在
為金人所獲

天祚六女

蜀國公主伊林文妃生為金人所獲

按金史宗望傳太祖嘉宗望功以遼

蜀國公主伊林賜之本傳不載附錄于此

元妃生三女宮人生二女俱為金人所獲

欽定續通志卷七十八

欽定四庫全書

欽定續通志卷七十九

后妃傳

九

金

太祖聖穆唐古皇后

光懿費摩皇后

欽憲赫舍哩皇后

宣獻布薩皇后

蕭崇妃

太宗欽仁唐古皇后

熙宗悼平費摩皇后

海陵嫡母圖克坦氏

海陵母大氏

海陵后圖克坦氏

世宗明德烏凌阿皇后

張元妃

李元妃

章宗孝懿圖克坦皇太后

章宗慶懷富察皇后

李元妃

衛紹王圖克坦后

宣宗王皇后

明惠王太后

哀宗圖克坦皇后

太祖聖穆皇后唐古氏天會十三年追謚

按金史太祖后傳前載始

祖以下十世諸后
今依鄭志從刪

光懿皇后費摩氏天會十三年追謚

欽憲

熙宗紀
作欽獻

皇后赫舍哩氏天會十三年尊為太皇太

后宮號慶元十四年正月己巳朔熙宗朝于慶元宮然
後御乾元殿受羣臣賀是月丁丑崩于慶元宮二月癸
卯祔英睿陵

宣獻皇后布薩氏睿宗母也天會十三年追冊曰德妃
大定元年追謚與三后並祔太祖廟室

崇妃蕭氏熙宗時封貴妃天德二年正月封元妃是月

尊封太妃海陵母大氏事之甚謹海陵篡立尊大氏為
皇太后居永寧宮每有宴集太妃上坐大氏執婦禮海
陵積不能平及殺宗義等誣太妃以隱惡殺之併殺其
子任王威赫大定十九年詔改葬致祭帝欲復太妃舊
號禮官議前代稱太妃者皆以子貴稱后繫夫稱太繫
子蕭妃不得稱太止當追封妃乃封崇妃云

太宗欽仁皇后唐古氏熙宗即位與太祖欽憲皇后俱
尊為太皇太后號明德宮天會十四年正月己巳朔帝

朝兩宮太后然後御乾元殿受賀自後歲以為常皇統二年上如天開殿皇子生使使馳報太后太后至天開殿上與皇后親迎之三年崩于明德宮謚曰欽仁皇后祔葬泰陵

熙宗悼平皇后費摩氏熙宗即位封貴妃

按照熙宗紀立費摩氏為貴

妃亦在天眷元年

天眷元年立為皇后皇統元年熙宗受尊號

冊為慈明恭孝順德皇后二年太子濟安生熙宗喜甚乃肆赦告天地宗廟彌月冊為皇太子未一歲薨熙宗

在位宗翰宗幹宗弼相繼秉政宗弼既沒舊臣亦多物
故后干預政事無所忌憚朝官往往因之以取宰相熙
宗未有繼嗣后頗掣制之熙宗內不能平因縱酒酗怒
手刃殺人左丞相亮生日帝遣大興國以物賜之后亦
附賜禮物熙宗怒杖興國而奪回所賜近侍高壽星隨
例遷屯燕南入訴于后后激怒熙宗殺左司郎中三合
杖平章政事秉德而壽星竟不得遷久之熙宗積怒遂
殺后海陵已弑熙宗欲收人心以后死無罪降熙宗為

東昏王追謚后為悼皇后大定間復熙宗帝號加謚后
為悼平皇后祔葬思陵

海陵嫡母圖克坦氏宗幹之正室也圖克坦無子次室
李氏生長子鄭王克次室大氏生三子長即海陵庶人
也圖克坦氏賢遇下有恩意大氏事之甚謹相得歡甚
圖克坦養克為己子克嗜酒圖克坦常責怒之尤愛海
陵海陵自以其母大氏與圖克坦有嫡妾之分心常不
安及弒熙宗圖克坦與太祖妃蕭氏聞之相顧愕然曰

帝雖失道人臣豈可至此及入宮見海陵不賀海陵銜
之天德二年正月圖克坦與大氏俱尊為皇太后圖克
坦居東宮號永壽宮大氏居西宮號永寧宮圖克坦太
后生日酒酣大氏起為壽太后方與坐客語大氏跽者
久之海陵怒而出明日召諸公主宗婦與太后語者皆
杖之大氏以為不可海陵曰今日之事豈能尚如前日
邪自是嫌隙愈深天德四年海陵遷中都獨留圖克坦
於上京圖克坦常憂懼每中使至必易衣以俟命大氏

至中都常念圖克坦太后謂海陵曰永壽宮侍吾母子甚厚慎毋相忘也十二月十四日圖克坦生日海陵使祕書監納哈塔椿年往上京上壽貞元元年大氏病篤恨不得一見臨終謂海陵曰汝以我故不令永壽宮偕來中都我死必迎致之事永壽宮當如事我三年右丞相布薩師恭太宗正丞哈布爾往上海陵奉遷山陵海陵以母大氏臨終言並迎永壽宮太后與俱來繼使平章政事蕭玉迎祭祖宗梓宮于廣寧海陵謂玉曰醫巫閭山

多佳致祭奠禮畢可奏太后於山水佳處遊覽及至沙
流河海陵迎謁梓宮遂謁見太后十月太后至中都海
陵率百官郊迎入居福康宮是日海陵及後宮宰臣以
下奉觴上壽極歡而罷海陵侍太后于宮中外極恭順
見者以為至孝太后亦以為誠然及謀伐宋太后諫止
之海陵益不悅再遷汴京太后居寧德宮使侍婢高福
娘問海陵起居海陵幸之因使伺太后動靜及樞密使
布薩師恭征契丹薩巴辭謁太后太后與師恭語久之

大概言國家世居上京既徙中都又自中都至汴今又興兵涉江淮伐宋疲弊中國我嘗諫止之不見聽契丹事復如此奈何福娘以告海陵海陵意謂太后以充為子充四子皆成立恐師蔡將兵在外太后或有異圖乃召默檢大懷忠等使殺太后於寧德宮且戒之曰汝等見太后但言有詔令太后跪受即擊殺之太后方擣蒲大懷忠等至令太后跪受詔太后愕然方下跪華特默從後連擊之仆而復起者再高福等縊殺之年五十三

海陵命焚太后于宮中棄其骨于水并殺充之子塔納
阿里布元努額布勒逃匿歸於世宗自軍中召師恭還
殺之封高福娘為鄖國夫人以福娘夫特默格為澤州
刺史大定間謚圖克坦氏曰哀皇后自澤州械特默格
福娘至中都誅之其後貶海陵為庶人宗幹去帝號復
封遼王圖克坦氏降封遼王妃云

海陵母大氏天德二年正月與圖克坦氏俱尊為皇太
后大氏居永壽宮及遷中都圖克坦太后獨留上京大

氏常以為言貞元元年四月大氏病篤遺言海陵當善
事永壽宮戊寅崩貞元三年大祥海陵率後宮奠哭于
敢宮海陵將遷山谷於大房山故大氏猶在敢宮也九
月太祖太宗德宗梓宮至中都尊謚曰慈憲皇后海陵
親行冊禮與德宗合葬于大房山升祔太廟大定七年
降封海陵太妃削去皇后謚號及宗幹降帝號封遼王
詔以圖克坦氏為妃而大氏及順妃李氏寧妃蕭氏文
妃圖克坦氏並追降為遼王夫人

廢帝海陵后圖克坦氏太師舍音之女初為岐國妃天德三年封為惠妃九月立為皇后生太子光英后以太子居深宮之中不知民間稼穡之務乃因太子生日繪田家稼穡圖以賜海陵後宮寢多后寵頗衰希得進見正隆六年海陵幸南京六月癸亥左丞相張浩率百官迎謁海陵備法駕乘玉輅與后及太子光英共載而入海陵伐宋后與光英居守瓜洲兵變海陵遇害圖們額哩頁殺光英于汴后遷中都居于海陵母大氏故宮頃

之世宗憐其無依詔歸父母家于上京歲賜錢二千貫
奴婢皆給官廩大定十年卒初海陵後宮皇后以下止
有元妃大氏宸妃蕭氏麗妃耶律氏三人及其侈心既
萌淫嬖無厭殺諸宗室納其妻女其妃嬪封號有元妃
姝妃惠妃貴妃賢妃宸妃淑妃德妃昭妃溫妃柔妃凡
妃主宗婦當私之者皆分屬諸妃位云按元史于此下
備載海陵諸嬖
然考賈益謙傳云海陵被弑能暴其惡者輒得美官故
一時多所附會是史文固未可盡信不獨事涉穢褻也

之刪

世宗明德皇后烏陵阿氏其先居海倫河世為烏陵阿部長率部族來歸居上京與本朝為婚姻曾祖雙寬康宗時累使高麗父實德琿騎射絕倫以功授世襲穆昆為東京留守后聰敏孝慈容儀整肅在父母家宗族皆敬重之既歸世宗事舅姑孝敬治家有叙甚得婦道睿宗伐宋得白玉帶蓋帝王之服御也睿宗歿後后謂世宗曰此非王邸所宜有也當獻之天子世宗獻之熙宗熙宗酤酒獨於世宗無間海陵篡立深忌宗室后勸世

宗多獻珍異以說其心海陵以世宗為恭順畏已由是忌刻之心頗解后不妬忌為世宗擇後房廣繼嗣雖顯宗生後而此心不移后嘗有疾世宗為視醫藥數日不離后曰大王視妾過厚其知者以為視疾不知者必有專妬之嫌世宗在濟南海陵召后来中都后謂世宗曰我不行帝必害王我當自勉不以相累也召王府臣僕張謹言諭之曰為我禱諸東嶽我不負王使皇天后土明鑒我心召家人謂之曰自我為婦以至今日未嘗見

王有違道之事今宗室往往被禍皆奴僕誣陷之汝等皆先國王舊人當念舊恩毋或妄圖也違此言者我于冥中必不赦后既離濟南從行者知后必不肯見海陵將自為之所防護甚謹行至良鄉去中都七十里防者稍緩后得間即自殺海陵猶疑世宗教之改世宗西京留守大定二年追冊為昭德皇后立別廟以后兄暉子天錫為太尉帝謂天錫曰朕幼與皇后定婚乃祖嘗曰此婿後來必大吾門今卜葬有期昔言驗矣十一年世

宗宴於東宮謂皇太子曰汝母婦道至矣朕所以不立中宮者念皇后之德故也二十九年祔葬興陵章宗時有司奏太祖謚有昭德字改謚明德皇后

元妃張氏父玄微母高氏與世宗貞懿皇后葭莩親世宗納為次室生趙王永中而卒大定二年追封宸妃累進元妃

元妃李氏南陽郡王李石女生鄭王允蹈衛紹王允濟潞王允德大定七年封元妃世宗感念明德皇后不復

立后元妃下皇后一等在諸妃上雖貴不得預政故宮
壺無事二十一年薨殯于興德宮西位別室二十八年
九月陪葬于坤厚陵衛紹王即位追謚先獻皇后貞祐
三年九月削皇后號

章宗母孝懿皇太后圖克坦氏其先德里必喇人也曾
祖綽從太祖取遼有功命以所部為明安世襲之祖博
勒和以戰功多累官開府儀同三司贈司徒齊國公父
貞尚遼王宗幹女梁國公主加駙馬都尉贈太師廣平

郡王后性莊重寡言父母嘗令總家事諸男不及也世宗初即位謂貞曰卿家法可尚其以卿女為朕子妃及顯宗為皇太子大定四年九月備禮親迎于貞第是年十一月顯宗生辰初封為皇太子妃既而皇孫生是為章宗時世宗幸金蓮川次冰井翌日臨幸撫視甚歡后素謙謹每畏其家世宗寵見父母流涕而言曰高明之家古人所忌願善自保持其後家果以海陵事敗蓋其遠慮如此世宗嘗謂諸王妃公主曰皇太子妃容止合

度服飾得中爾等當法效之章宗即位尊為皇太后更所居仁壽宮名曰隆慶宮詔歲奉母拘其數上月或五朝六朝而后愈加敬儉見諸大長公主禮如平時敦睦九族恩紀皆洽尤惡間人過諛佞之言無所得入恕以容物未嘗見喜愠然御下公平雖至親無所阿徇常誠諸姪曰皇帝以我故乃推恩外家當盡忠圖報勿謂小善為無益而弗為小惡為無傷而弗去毋藉吾之貴輒肆非違以干國家常憲一日妹并國夫人嫂涇國夫人

等侍側因諭之曰爾家累素重且非豐厚宜節約財用
勿以我為可恃吾受天下之養豈有所私積哉況財用
者天下之財用也吾終不能多取以富爾之私室明昌
元年禮官議以五月奉上册寶后弗許上屢為之請后
曰今世宗服未終遽衣錦繡珮珠玉於禮何安當俟服
闋行之上諭有司曰太后執意甚堅其待來年明昌二
年正月崩于隆慶宮年四十五謚曰孝懿祔葬裕陵后
好詩書造次必于禮逮嬪御以和平其有生子而母亡

者視之如已所生慈訓無間上時問安見事有未當者

必加之嚴誡云

按原史睿宗顯宗諸后並列后妃傳今考鄭志及諸史例以孝懿身受冊命改

稱章宗母皇太后仍列之后妃傳中其身後追尊者概從刪節

章宗欽懷皇后富察氏上京路哈斯罕人父鼎壽尚熙

宗鄭國公主累官至金吾衛上將軍贈太尉越國公后

始生就養於姨冀國公主姿性淑明丰儀粹穆知讀書

為文孝事冀國如事所生大定二十三年章宗為金源

郡王行納采禮是年十一月備禮親迎封金源郡王夫

人後進封妃封生絳王洪裕而薨帝即位遂加追冊大
安初祔葬于道陵

元妃李氏名師兒其家有罪没入官籍監大定末以監
戶女子入宮從宮教張建學故事宮教以青紗隔障蔽
内外宮教居障外諸宮女居障內不得面見章宗嘗問
建宮教中女子誰可教者建對曰就中聲音清亮者最
可教章宗以建言求得師兒官者梁道譽其才美勸納
之妃性慧黠能作字尤善伺候顏色迎合旨意遂大愛

幸明昌四年封為昭容明年進封淑妃追贈三代兄喜
兒與弟特爾格皆擢顯近勢傾朝廷財利競進之徒爭
趨走其門怙財固位上下紛然雖知其姦蠹不敢擊之
自慶懷皇后沒中宮虛位久章宗意屬李氏而國朝故
事皆圖克坦唐古富察納喇布薩赫舍哩烏陵阿烏庫
哩諸部部長之家世為婚姻娶后尚主而李氏微甚章
宗欲立之大臣固執不從帝不得已進封為元妃而勢
位熏赫與皇后侔矣承安五年帝以繼嗣未立禱祀太

廟山陵遣近臣詣諸岳觀祈禱泰和二年八月丁酉元妃生皇子德里既彌月詔賜名封為葛王生滿三月敕放僧道度牒三千道設醮於玄貞觀祈福二歲而薨八年承御賈氏及范氏皆有娠未及乳月章宗得疾時衛王永濟自武定軍來朝章宗于父兄中最愛衛王欲立之衛王朝辭章宗謂衛王曰叔王不欲作主人遽爾去邪元妃在傍謂帝曰此非輕言者十一月乙卯章宗大漸衛王未發元妃與黃門李新喜議立衛王使內侍潘

守恒召之守恒謂妃此大事當與大臣議迺使召平章政事完顏匡匡至遂與定策立衛王章宗遺詔有云朕之內人見有娠者兩位如其中有男當立為儲貳如皆
是男子擇可立者立之衛紹王即位詔謂先帝承御賈氏當以十一月免乳今則已出三月事未可知范氏胎氣有損深用怛然又詔以元妃李氏潛計負恩與李新喜謀令賈氏詐稱有身計取他兒以充皇嗣令賜李氏自盡李新喜正典刑李氏兄喜兄弟特爾格追除爵位

復係監籍於遠地安置承御賈氏亦賜自盡宣宗即位
下詔昭雪賈氏事當時被罪貶責者俱令放免由是李
氏家族皆得還

衛紹王后圖克坦氏大安元年立為皇后至寧元年呼
沙呼亂與衛王俱遷于衛邸帝遇弒宣宗即位衛王降
為東海郡侯圖克坦氏削皇后號貞祐二年遷都汴詔
凡衛紹王及鄆厲王家人皆徙鄭州仍禁錮不得出入
天興元年詔釋禁錮是時河南已不能守子孫不知所

終

宣宗皇后王氏中都人明惠皇后妹也初宣宗封翼王章宗詔諸王求民家子以廣繼嗣后入王邸及見后姊有姿色又納之貞祐元年九月封后為元妃姊為淑妃淑妃生哀宗后無子養為己子貞祐二年七月賜姓溫都氏立為皇后三年莊獻太子薨哀宗為太子宣宗崩哀宗即位正大元年尊后為皇太后號其宮曰仁聖受封之日后夢丐者數萬踵其後心甚惡之及元兵圍汴

加以大疫汴城之民死者百餘萬后皆目覩焉哀宗釋服將禘饗有司奏冕服成上請兩宮太后御內殿因試衣之以見兩宮大悅曰祖宗取天下甚不易何時使四方承平百姓安樂天子服此法服于中都祖廟行禘饗乎上曰阿婆有此意臣亦何嘗忘慈聖曰恒有此心則見此當有期矣遂酌酒為壽歡然而罷天興元年冬哀宗遷歸德二年正月遣近侍圖克坦肆喜珠嘉塔克寶布奉迎兩宮后御仁安殿出鈿金及七寶金洗分賜從

行忠孝軍是夜兩宮及柔妃費摩氏等乘馬出宮至陳留城左右火起疑有兵不敢進后亟命還宮明日入京
愬肆喜家少頃輦迎入宮方謀再行京城破后及諸妃
嬪北遷不知所終惟寶符李氏從至宣德州居摩訶院
宿佛殿中會當同行將發自縊死且自書門紙曰寶符
御侍此處身故

明惠皇后王皇后之姊也生哀宗封元妃哀宗即位詔
尊為皇太后性端嚴頗達古今哀宗已立為皇太子有

過尚切責之一日宮中就食尚器以玉盃楪奉太后及
帝后以瑪瑙器進荆王母真妃龐氏太后召主者責曰
誰令汝妄生分別非飲食細故令有司杖殺汝矣自後
宮中奉真妃有加或告荆王謀不軌下獄議已定后曰
汝止一兄奈何以讒言欲害之趣赦出使來見我移時
不至吾不見汝矣帝起后立待王至涕泣慰撫之哀宗
甚寵一宮人欲立為后太后惡其微賤固命出之不得
已放之出宮點檢薩哈連教上騎鞠后傳旨戒之云汝

等為人臣當輔主以正顧乃教之戲耶比年小捷文士有奏賦頌言聖德中興者后不悅曰帝年少氣銳無懼心則驕怠生今幸一勝何謂中興而諂之如是正大八年九月崩遺命園陵制度務從儉約十二月己未葬汴城迎朔門外謚曰明惠皇后

哀宗皇后圖克坦氏宣宗及后有疾后嘗割膚以進興定四年后父鎮南軍節度使烏凌有罪宣宗以后純孝因曲赦之正大元年詔立為皇后哀宗遷歸德遣后弟

肆喜等詣汴奉迎夜至陳留不敢進復歸於汴未幾城破北遷不知所終

欽定續通志卷七十九

欽定四庫全書

欽定續通志卷八十

后妃傳十

元

太祖光獻翼聖皇后

太宗昭慈皇后

定宗欽淑皇后

憲宗貞節皇后

世祖昭睿順聖皇后

諾爾布皇后

成宗母徽仁裕聖皇太后

成宗貞慈靜懿皇后

布爾罕皇后

武宗母昭獻元聖皇太后

武宗宣慈惠聖皇后

蘇喀實哩皇后

伊奇哩氏
唐古氏

仁宗莊懿慈聖皇后

英宗莊靜懿聖皇后

泰定帝巴拜哈斯皇后

鴻吉哩氏二妃

明宗貞裕徽聖皇后

班布爾實皇后

文宗布達實哩皇后

寧宗塔哩雅圖默色皇后

順帝喇特納實哩皇后

巴延呼圖克皇后

諤勒哲呼圖克皇后

太祖光獻翼聖皇后名布爾特格勒津鴻吉哩氏托音

色辰女也托音色辰與子阿禪從太祖征伐有功封王

爵有旨生女為后生男尚公主世世不絕世祖至元二

年

按元史祭祀志載至元三年十月始定尊謚廟號太
祖本紀載追謚年月與志相符后妃表及諸后傳則

並作二年今姑仍其舊

追謚光獻至大二年加謚光獻翼聖皇后

按后妃表云至元二年追謚光獻至大二年
加謚翼聖原文統繫之至元二年今改正

升祔太祖

廟其餘后妃有四鄂爾多四十餘人不記氏族其名悉

見於表後皆倣此

太宗昭慈皇后名托里格呼勒尼瑪察氏生定宗太宗

崩后稱制攝國者五年定宗立朝政多出於后至元二年崩追謚昭慈皇后升祔太宗廟

定宗欽淑皇后名烏拉海額實定宗崩后抱子寶勒們垂簾聽政者六月至元二年追謚欽淑皇后

憲宗貞節皇后名呼圖克臺鴻吉哩氏托音色辰孫孟克沁之女也蚤崩至元二年追謚貞節皇后升祔憲宗廟

世祖昭睿順聖皇后名徹伯爾鴻吉哩氏濟寧忠武王

阿禪女也生裕宗中統初立為皇后至元十年授冊寶
上尊號貞懿昭聖順天睿文光應皇后一日四集賽官
奏割京城外近地牧馬帝許之后諫曰向初定都時若
以地牧馬則可今軍民分業已定奪之可乎帝默然命
寢其事后嘗於太府監支繒帛帝曰此軍國所需非私
家物后何可得支后自是率宮人親執女工拘諸舊弓
弦練之緝為綢以為衣其勒密比綾綺宣徽院羊膍皮
置不用后取之合縫為地毯其勤儉有節類如此十三

年平宋主朝於上都衆皆歡甚唯后不樂帝問其故
后跪奏曰妾聞自古無千歲之國母使吾子孫及此則
幸矣帝以宋府庫故物聚置殿庭召后視之后徧視即
去帝遣問后所欲取后曰宋人貯蓄以遺子孫子孫不
能守而歸我我何忍取一物耶時宋太后全氏至京不
習北方風土后為奏令回江南帝不允后退益厚待之
后性明敏達於事機國家初政左右匡正當時與有力
焉十四年

后妃表作十八年

二月崩成宗立追謚昭睿順聖皇

后升祔世祖廟

諾爾布皇后鴻吉哩氏納沁孫仙童女也至元二十年
納為皇后繼守正宮時世祖春秋高頗預政相臣常不
得見帝輒因后奏事焉有子一人名特默齊

成宗母徽仁裕聖皇太后伯奇音濟齊一名庫庫沁鴻
吉哩氏生順宗成宗先是世祖出獵道渴見女子緝駝
茸於帳房因從覓馬潼女子曰馬潼有之但父母諸兄
皆不在我女子難以與汝世祖欲去女子又曰我獨居

此汝自來自去於理不宜我父母即歸姑待之須臾果
歸出馬湏飲世祖世祖既去歎曰得此等女為婦豈不
美耶後與諸臣謀擇太子妃有老臣嘗知向者之言知
其未許嫁言於世祖世祖大喜納為太子妃后性孝謹
善事中宮世祖稱之為賢德媳婦侍昭睿順聖皇后不
離左右一日裕宗有病世宗往視見牀上設織金卧褥
世宗愠曰我嘗以汝為賢何乃若此后跪答曰常時不
曾敢用今為太子病因用之即時徹去世祖崩成宗至

上都諸王畢會先是御史中丞崔或得玉璽於穆呼哩國王曾孫世德家其文曰受命於天既壽永昌上之於后至是后手授成宗即皇帝位尊后為皇太后命設官屬置徽政院後院官有受獻浙西田七百頃籍於位下太后曰我寡居婦人衣食自有餘況江南率土皆國家所有我曷敢私之命中書省盡易院官之受獻者后之弟欲因后求官后曰若欲求官耶汝自為之勿以累我也其後弟果被黜人皆服后之先見大德四年二月崩

祔葬先陵謚曰裕聖皇后升祔裕宗廟至大三年十月

又追尊謚曰徽仁裕聖皇后

按徽仁裕聖身為皇太后昭獻元聖身為太皇太后

非身後追尊者可比原史與肅宗顯宗二后別為一卷今稽其世次列之后妃傳中從宋史杜太后之例也

成宗貞慈靜懿皇后名寶哩達喇鴻吉哩氏額埒春之

女大德三年十月立為后

按成宗大德三年十月授冊實此巴約特氏事也至鴻吉

哩氏后妃表祇稱元妃武宗時追謚冊文亦稱元妃且云椒掖正名莫際龍飛之會則是未嘗立為后也后字

當是元妃字之誤

生皇子德壽早薨武宗至大三年

后妃表作至大元年

追尊謚貞慈靜懿皇后升祔成宗殿室

布爾罕皇后巴約特氏駙馬圖埒實之女元貞初立為
皇后大德三年十月授冊寶時帝多疾后居中用事信
任相臣哈喇哈斯大德之政人稱平允皆后處決后嘗
謀貶順宗妃塔濟與其子仁宗出居懷州十一年帝崩
時武宗在北邊恐其歸必報前怨乃取安西王阿南達
實哩來京師謀立之仁宗自懷州入迎武宗於北邊乃
誅安西王并廢后出居東安州尋殺之

武宗母昭獻元聖皇太后名塔濟鴻吉哩氏阿禪孫呼

圖克特穆爾之女裕宗居燕邸及潮河順宗俱在侍稍
長世祖賜女實古氏後乃納后為妃生武宗及仁宗大
德九年成宗不豫布爾罕皇后秉政遣仁宗母子出居
懷州十年十二月后至懷州十一年正月成宗崩時武
宗總兵北邊左丞相達爾罕哈喇哈斯陰遣使報仁宗
與后奔還京師即遣使迎武宗還以五月即位先是太
后感於陰陽家言遣近臣托爾諭旨武宗曰汝兄弟二
人皆我所出豈有親疎術家所言運祚修短不容不思

也武宗聞之默然進喀喇托克托而言曰我捍北邊十年又膺次居長太后以星命為言茫昧難信使我設施合於天心民望雖一日之短亦足垂名萬世何可以陰陽家言而乖祖宗之法哉托克托以聞太后愕然曰吾為太子遠慮所以深愛太子也既如是言當速來耳武宗既立即日尊太后為皇太后立仁宗為皇太子三宮協和十一月帝朝太后於隆福宮上皇太后玉冊玉寶至大元年三月帝為太后建興聖宮二年四月立興聖

宮江淮財賦總管府以司太后錢糧三年二月以上皇太后尊號告祀南郊十月帝率皇太子諸王羣臣朝興聖宮上皇太后尊號冊寶月儀天興聖慈仁昭懿壽元皇太后詔赦天下四年仁宗即位延祐二年三月帝率

諸王百官奉玉冊玉寶加上皇太后尊號曰儀天興聖

慈仁昭懿壽元全德

后妃表
作合德

泰寧福慶皇太后七年英

宗即位十二年奉玉冊玉寶加上尊號曰儀天興聖慈仁昭懿壽元全德泰寧福慶徽文宗祐太皇太后丙辰

太后御大明殿受朝賀戊辰告太廟太后見明宗少時有英氣而英宗稍柔懦諸羣小以立明宗必不利於已遂擁立英宗及既即位太后來賀英宗即毅然見於色后退而悔曰我不擬養此兒耶遂飲恨成疾至治二年

九月崩三年三月升祔順宗廟

按英宗紀后崩及祔廟年月不同原傳並係之

三年今改正

后性聰慧歷佐三朝教宮中侍女皆執治女功

親操井臼然不事檢飭自正位東朝濁亂朝政無所不至及英宗立羣倖伏誅而後勢燄頓息焉

武宗宣慈惠聖皇后名珍格鴻吉哩氏托里子班巴爾之女至大三年四月冊為皇后泰定四年十一月崩謚曰宣慈惠聖皇后升祔武宗廟

蘇喀實哩皇后阿禪哈爾吉之女珍格皇后之從妹也

伊奇哩氏鈕掄公主之女實生明宗天歷二年追謚仁

獻章聖皇后

按順帝紀至正六年改明宗母徽號曰莊獻嗣聖皇后本傳失載附識於此

唐古氏生文宗天歷二年追謚昭聖皇后

仁宗莊懿慈聖皇后名阿南達實哩鴻吉哩氏生英宗

皇慶二年三月冊為皇后上冊寶遣官祭告天地於南

郊及太廟英宗即位上尊號曰皇太后至治二年崩

按后

妃表云延祐七年上尊謚與本傳先後異時

謚莊懿慈聖皇后升祔仁宗廟

英宗莊靜懿聖皇后名蘇喀巴拉伊奇哩氏昌國公主
伊勒噶雅女也至治元年冊為皇后泰定四年六月崩
謚曰莊靜懿聖皇后

泰定帝巴拜哈斯皇后鴻吉哩氏阿禪孫鄂蘭徹爾之

女

后妃表作充王邁珠罕女

泰定元年冊為皇后

妃二人一曰必罕一曰蘇喀達哩皆鴻吉哩氏克王邁珠罕之女也文宗天歷初俱安置東安州

明宗貞裕徽聖皇后名瑪勒岱生順帝而崩至元二年

按順帝紀至元二年追尊生母為貞裕徽聖皇后原傳作文宗誤今改正

追謚為貞裕徽聖

皇后

班布爾寶皇后壽寧公主女也

按后係瑪勒氏見元史類編

侍明宗

潛邸生寧宗天歷二年立寧徽寺掌皇后宮事至順元

年四月崩

文宗布達實哩皇后鴻吉哩氏父駙馬魯旺多阿克巴
拉母魯國公主僧格嘉勒帝居建業后亦在行及即位
立為皇后天歷二年授冊寶至順元年四月與官者拜
珠謀殺明宗后班布爾實三年八月帝崩后導馭末命
申帝初志立明宗次子伊埒哲伯是為寧宗十一月奉
玉冊玉寶尊為皇太后寧宗崩大臣請立太子雅克特
古斯后曰天位至重吾子尚幼明宗長子托歡特穆爾
在廣西理當立之於是迎至京師即位是為順帝元統

元年

順帝紀作至元元年

尊為太皇太后仍稱制臨朝六年詔去

尊號安置東安州尋崩

寧宗塔哩雅圖默色皇后鴻吉哩氏至順三年立為皇

后至正二十八年崩升祔寧宗廟

順帝喇特納實哩皇后欽察氏

順帝紀作巴約特氏

太師太平王

雅克特穆爾之女至順四年

按至順祇有三年次年即元統元年也但順帝於是

年六月即位十月改元而立后則在八月故仍稱至順年號

立為后元統二年授冊

寶三年后兄御史大夫騰吉斯以謀逆誅弟塔喇海走

匿后宫后以衣蔽之因遷后出宮丞相巴延鵠后於開
平民舍

巴延呼圖克皇后鴻吉哩氏宣慈惠聖皇后珍格姪毓
德王博羅特穆爾之女也至元三年立為皇后生皇子
珍戩二歲而天后性節儉不妬忌動以禮法自持第二

皇后奇氏

按本傳作第三皇后據奇氏后傳改

素有寵居興聖西宮帝希

幸東內后無幾微怨望意從帝巡上京次中道帝遣內
官傳旨欲臨幸后辭曰暮夜非至尊往來之時內官往

復者三竟拒不納帝益賢之居坤德殿終日端坐未嘗
妄踰戶闥至正二十五年八月崩年四十二踰月皇太
子自冀寧歸哭之甚哀

鄂勒哲呼圖克皇后奇氏高麗人生皇太子阿裕實哩
達喇家微因后貴三世皆追封王爵初進為宮女主供
茗飲性穎黠日見寵幸後喇特納實哩皇后方驕妬數
箠辱之喇特納實哩既遇害帝欲立之丞相巴延爭不
可巴延罷相立為第二皇后居興聖宮嘗取女孝經史

書訪問歷代皇后之有賢行者為法四方貢獻或有珍
味輒先薦太廟然後敢食至正十八年京城大饑后命
官為粥食之又出金銀粟帛於京都十一門置冢葬死
者遺骸十餘萬時帝頗怠於政治后與皇太子阿裕實
哩達喇遽謀內禪遣保布哈諭意丞相太平太平不答復
召至宮自申前請太平依違而已帝知后意怒而疏之
兩月不見初竒氏之族在高麗者怙勢驕橫高麗王盡
殺之二十三年后謂皇太子曰汝何不為我復仇遂立

高麗王族人留京師者為王以奇族之子三寶努為元子遣同知樞密院事崔特穆爾為丞相用兵一萬并招倭兵共往納之過鴨綠水伏兵四起大敗而還二十四年博囉特穆爾稱兵犯闕皇太子出奔冀寧下令討博囉特穆爾博囉特穆爾怒嗾御史武起宗言后外撓國政宜遷出於外帝不答二十五年遂矯制幽於諸色總管府至百日始還宮及博囉特穆爾死召皇太子還京師后傳旨令庫庫特穆爾以兵擁皇太子入城欲脅帝

禪位庫庫特穆爾至城三十里外即遣軍還營會巴延呼圖克皇后崩中書省臣言后宜正位中宮帝不答又奏乃授之冊寶命為皇后二十八年從帝北奔

公主附

按元史無公主傳其見於表者諸王女居大半焉今依漢唐例專輯帝女取其可考

者著於篇

烈祖女

按唐宋遼公主傳悉依鄭志後漢書例冠以某宗幾女元史記載弗詳疑多闕佚故稱某宗女

而不言其數云

昌國公主托摩掄下嫁忠武王巴圖蚤薨

金史卷八十一
卷八十一
太祖女

昌國公主色辰必濟下嫁忠武王巴圖為繼室

伊埒哈屯公主下嫁伊都呼巴爾斯阿勒臺德濟

趙國公主阿嚕罕必濟下嫁趙武毅王巴剌噶公主明

睿有智畧太祖征伐四出嘗使留守軍國大事諮稟而

後行故師出無內顧憂巴剌噶未有子公主為進姬妾

生三子視之如已出追封齊國大長公主加封趙國

太宗女

蘇爾噶汗公主下嫁納克納克托音色辰曾孫也

定宗女

雅克默色公主下嫁趙忠襄王準布哈追封趙國大長公主

巴克巴噶爾公主下嫁伊都呼呼實哈爾德濟

憲宗女

昌國公主巴雅爾下嫁昌忠宣王和琳

世祖女

烏爾噶公主下嫁和琳從弟布哈

魯國公主囊嘉特章下嫁額埒春再嫁曼濟臺成宗初
封大長公主

趙國公主伊埒下嫁趙武襄王阿布噶

齊國公主呼圖克濟延默色下嫁高麗王愷

按高麗傳
愷後改名

噶又改
名

成宗女

趙國公主阿爾默色下嫁趙忠獻王科爾吉斯科爾吉

斯初娶裕宗女呼圖克臺默色大德九年並封趙國大

長公主

昌國公主伊勒噶雅下嫁和琳子昌王阿寶克

仁宗女

庫庫楞公主下嫁托音色辰孫托囉果為繼室

明宗女

明慧貞懿公主布達實哩

欽定續通志卷八十

欽定四庫全書

史部

欽定續通志卷八十一

主事臣尹壯圖覆勘

總校官原任侍講臣王燕緒

欽定四庫全書

欽定續通志卷八十一

氏族畧

總敘

臣等謹按氏族分合古今不同三代而上姓合而
氏分男子稱氏女子言姓故姬姓一也而周之子
孫氏凡百數周官小史辨昭穆奠系世瞽矇誦詩
并誦系氏以詒於王侯國亦有國史掌其系牒良

以姓氏分而難稽其制不得不詳也自封建罷為郡縣則氏族統而合於姓姓氏合而易識史官之牒亦畧矣然賜姓出宗避諱避仇之例起混淆紊錯棼如亂絲北魏又以代北之氏更易漢姓世遠年湮後人往往有不能辨者故官有簿狀家有譜系歷代有圖譜局置郎令史掌之以備選格通婚姻唐世領以宰相其鄭重猶然若此五季至宋譜牒之學畧而不講鄭樵通帝王以來迄於五季約

書志之文而為畧其有功於氏族非淺鮮也若夫
遼元起自朔陞金源興於東徼風俗敦龐民情質
樸合族而處因地而別貴有號而賤無氏遼世祇
有耶律與蕭二姓其餘皆稱部族猶然太古之遺
也金源有白黑姓以別貴賤載百官志元代有蒙
古色目姓以分內外載於陶宗儀輟耕錄然考諸
史傳所見僅半而史傳所載多有不在此數者則
百官志輟耕錄不足以該金元二代之氏族明矣

又其中雖有以號以國以官以名如鄭志所分之類然寥寥數條不能據為典要故祇就國語解之例以部族姓氏分門可以包舉而號國官名僅摘取標題於總論以備義例焉其百官志輟耕錄附於論末加按以辨其疵誤至於部統族分稱謂有時小異有去族而從部者如元后妃傳竒氏之為索隆噶氏巴約特氏之稱欽察氏是也有合部族而稱者如金史之諾延溫都思忠元史之特爾格

舒穆魯愛辛是也凡此之類皆仍史文以為區別
庶於二代史族有條而不紊矣夫班固之斷代為
書為鄭氏所譏茲遼金氏族之見於元者不十數
氏且譯音互異反以滋後人之惑不若各從其代
之為無弊也再鄭氏著錄漢姓以三十二類別受
姓命氏之源凡類所不能盡者以四聲收之其體
例精而博矣而姑存其畧所遺尚多因考姓氏諸
書擇其典而確者依類補之無則闕之間有鄭氏

不詳所自而他書可補者亦不嫌於重載又四聲韻中稀僻之姓所收不過三之一補之何可勝補今惟有人可據者錄之空姓概從其畧竊以明代稀姓之多其故有三一金元之裔改漢姓者一革除之際變姓名者一苗蠻之族登仕版者倘不為之詳載恐暨乞誤呼語諸莫辨非所以資博聞矣故所補稀姓或古有今無者載古人或古今通有者載其源始而以宋明人繼之或鄭志已載而有

宋明人可續者亦為摘錄附於各韻之末使稀僻之姓可以瞭然指掌耳今纂遼金元氏族三卷總論一卷鄭志補遺四卷省去總目一例而序述其大畧為書凡八卷云

遼

國族

達呼哩氏

炎帝之後曰葛烏菟者世雄朔陞居鮮卑號鮮卑氏慕容燕并取其地分其部為三曰宇

文曰庫莫奚曰契丹隋唐之際契丹地直京師東北五千里而贏東距高麗西奚南營州北靺鞨室韋阻

冷陁山以自固其
君稱達呼哩氏

臣等謹按達呼哩氏始君遼世表不著名某但云
唐武德六年君長綽囉獻名馬豐貂貞觀三年摩
會入朝賜鼓纛由是有常貢太宗征高麗奚契丹
首領從軍還過營州置元州以契丹大帥統主據
曲為刺史置松漠都督府以庫克為都督改八部
為州隸之又營衛志云唐達呼哩氏八部并元州
松漠為十則達呼哩氏始君當是綽囉矣

約尼氏

唐武后時遣將攻契丹潰其衆達呼哩氏微弱別部長過折代之過折尋滅天寶間德呼勒部

長鼎時立達年嘉哩為蘇爾威汗更號約尼氏

臣等謹按新唐書契丹傳太宗時庫克舉部內屬乃置松漠都督府以庫克為使持節十州諸軍事松漠都督封無極男賜姓李又天寶四載契丹大帥李懷秀降拜松漠都督遼史表達年嘉哩唐賜姓名李懷秀則達呼哩約尼唐時俱賜姓李氏鄭志失載例應註於本氏之下因宋明兩朝賜姓無

可附錄故別列賜姓一門而遼金元賜姓亦彙入焉茲不再註

錫里氏

德呼勒部長聶呼之後左右約尼氏幾百年國勢復振至努爾蘇之孫曰安巴堅功業勃興號

錫里氏

耶律氏

唐咸通中錫里氏有安巴堅者母蕭氏夢日墮懷而娠及產室有神光異香三月能行晬而能

言知未然事及長身長九尺豐上銳下目光射人智勇殊衆累立戰功哈陶津汗命總知軍國事遺命立之是為遼太祖於是錫里與達呼哩約尼號三耶律並為耶律氏

臣等謹按部族志蘇爾威汗時分三耶律為七彼

時達呼哩約尼析為六錫里合為一所以德呼勒部強盛終代約尼則三耶律之稱不始於遼太祖也

外戚

舒敏氏

本蘇爾威汗時部因以為氏世為外戚

伊蘇濟勒氏

蘇爾威汗分二舒敏為五曰伊蘇濟勒氏國舅族也

巴哩氏

蘇爾威汗分二舒敏為五曰巴哩氏國舅族也

舒嚕氏

回鶻諾蘇之後太祖后族

蕭氏

后族伊蘇濟勒氏巴哩氏世任國事太祖慕漢高皇帝以伊蘇濟勒巴哩比蕭相國遂為蕭氏太祖

娶舒嚕氏太宗自汴將還留外戚小漢為汴州節度使賜姓名曰蕭翰由是巴哩伊蘇濟勒舒嚕三族皆為蕭氏

臣等謹按營衛志序云部落曰部氏族曰族契丹故俗分地而居合族而處有族而部者五院六院之類是也有部而族者奚王室韋之類是也有部而不族者特哩特默實保哈準之類是也有族而不部者約尼九帳皇族三父房是也此言部與族

之分合也又曰其氏族可知者畧具皇族外戚二表是則遼之氏族止有耶律蕭氏也即諸部中如諾延唐古等有入金元為氏者而遼時未著為姓與鄭志氏族之例不符故著而不錄第於金元姓氏內註明本遼部族云

列姓

大氏

唐初粟末靺鞨臣屬於高麗李勣破高麗粟末保東牟山後為渤海王姓大氏遼南府宰相大康义中

京留守大公鼎皆渤海人又平王隆光母大氏

臣等謹按唐武后時高麗別種大乞乞仲象分王
高麗故地後其子榮祚中宗封為渤海郡王是粟
末靺鞨之姓大氏在唐初已然而鄭樵大氏註中
失載今遼史列傳內惟大氏與諸漢姓不同故為
補入

屬國之姓

臣等謹按遼屬國五十有九其國姓絕無可考惟
西夏氏族獨詳於金史交聘表中非五十八國者

比因西夏起於唐末與遼金相為終始故以交聘
表所載附錄於遼後以從鄭樵列代北關西氏族
於漢姓篇末之例而宋遼元三史所有西夏氏族
亦備入焉

於彌氏

元史西夏國主李恒其先
姓於彌氏唐末賜姓李

臣等謹按遼金二史西夏傳皆云夏主拓跋魏之
後名思恭唐僖宗末年賜姓李元史云其先姓於
彌氏豈拓跋其總稱而於彌其分姓耶因是西夏

氏族故彙錄於此

威赫氏

遼興宗十九年正月遣使問罪於夏夏將旺布等攻之肅城耶律高嘉努等破之旺布被創遁

去殺威赫伊特凌
結五月旺布來降

巴哩氏

金交聘表夏巴哩公亮又殿前太尉巴哩昌祖押進匾匣使巴哩直信武功大夫巴哩安仁巴

祖哩慶

臣等謹按巴哩以下皆見金交聘表不再註

察喇氏

夏御史中丞
察喇公濟

額魯氏

夏武功大夫額魯元智又武功大夫額魯世殿前太尉額魯結甫額魯結先

威伊氏

夏武功大夫
威伊執信

紐鄂氏

夏武功大夫
紐鄂文忠

蔑布氏

夏武功大夫
蔑布師道

渾氏

夏武功大夫渾進忠
武節大夫渾光中

朗鄂特氏

夏左樞密朗鄂特進忠
智御史中丞朗鄂特文廣參知政事
朗鄂特元

德光

薩氏

夏武功大夫薩進德
執直薩進德

威紐氏

夏武功大夫
威紐執忠

諾爾桑氏

夏武功大夫
諾爾桑德昌

納琳氏

夏知中興府事納琳思
敬御史中丞納琳思聰

雅蘇氏

夏武節大夫
雅蘇守節

舒威氏

夏武節大
夫舒威英

巴沁氏

夏武節大
夫巴沁師德

蔑莽氏

夏殿前太尉
蔑莽友直

錫鄂氏

夏武功大
夫錫鄂紹昌

威載氏

夏武功大
夫威載師憲

威明氏

夏武功大夫威明仁顯
武節大夫威明世安

古沁氏

夏武功大夫
古沁文昌

罔氏

夏知中興府事罔進忠御史中
丞罔承德武節大夫罔敦信

穆納氏

夏武功大夫穆納好德
御史大夫穆納光祖

莽古氏

夏武功大夫莽古
進德莽古德懋

遇氏

夏武功大夫遇
忠輔遇惟德

羅伊氏

夏武節大夫羅伊
守忠羅伊思忠

哲伊氏

夏武節大夫
哲伊俊父

連都氏

夏武節大夫
連都敦信

諤氏

夏武節大夫
諤德忠

台楚嚕氏

夏武節大夫
台楚嚕忠毅

美赫氏

夏武節大夫
美赫宇文

烏爾氏

夏殿前太尉
烏爾思聰

錫勒氏

夏殿前太尉
錫勒遵義

紐紐氏

夏武節大夫
紐紐存忠
夏武節大夫
紐紐世忠

克氏

夏武節大夫
克德昭
夏武節大夫
克德元

烏伊氏

夏武節大夫
烏伊遂良

隗氏

夏武節大夫
隗敏修

密氏

夏御史中丞
密元禮

額伊氏

夏武功大夫
額伊德昌

頁允氏

夏知中興府事
頁允克忠
武節大夫
頁允思文

柔氏

夏武節大夫
柔思義

莊浪氏

夏武功大夫
莊浪義顯

黨氏

夏武功大夫
黨得敬

宇氏

夏宣德郎
宇得賢

權氏

夏御史大
夫權鼎雄

餘氏

夏翰林學
士餘良

精氏

夏精昂
精方

衛慕氏

夏主李繼遷母衛慕
氏宋封魏國太夫人

臣等謹按衛慕氏以下皆從宋史夏國傳補入

葉里氏

夏主德明母葉里氏夏主元昊妃葉里
氏又葉里仁榮主蕃學掣夏國文字

屈懷氏

夏主德明
妃屈懷氏

哩昂氏

夏首領哩昂阿裕爾

額氏

夏監軍額博羅

謨氏

夏使臣謨箇

昂氏

夏使臣昂利

瑪努勒氏

夏武功大夫瑪努勒紹文

葉朗氏

夏人葉朗羅里

鬼氏

夏蕃部巡檢鬼通又進表使家崖孛

呼氏

夏人呼珍

密密氏

夏主德明妃密密氏
又貢宋使密密乞遇

默藏氏

夏主元昊妃
藏氏生諒祚

摩益氏

夏主元昊
妃摩益氏

賞羅氏

宋環州种朴獲夏
賞羅鄂齊爾家屬

美勒氏

宋折可適獲夏
監軍美勒都輔

星多氏

夏右廂監軍
星多保忠

慕氏

夏樞密使慕
洎弟慕濬

昂氏

夏西南都
統昂星

芭氏

夏人
芭良

如定氏

夏主兵馬使如定多丹瑪
又使宋議事如定聿捨

聿氏

夏使臣
聿正

臣等謹按遼國外有十部附庸於遼如烏爾古部
回鶻部等亦有入金元為氏者又奚五部金大定
時定奚姓曰約囉曰伯特曰斡里曰穆濟曰吹皆
附見於金元姓氏茲不具列

欽定續通志卷八十一